

# Uvodnik

Savremeno islamsko mišljenje nalazi se pred izazovima religijskog pluralizma koji u znanstvenoj “slici svijeta” i njegovom tehničkom globaliziranju završava u relativizmu. Kako izbjeći relativiziranje istine kada na noćnom nebu sija bezbroj zvijezda? Na povijesnom planu pred muslimanima i dalje ostaje otvoreno i sve se više zaoštrava pitanje reforme islama. Da li je pitanje reforme islama ograničeno na pravne i socijalno-etičke sadržaje islamske misli i muslimanske prakse ili podrazumijeva hermeneutičko suočavanje s povijesnošću islama?

To su neka od pitanja kojima se bave tekstovi u rubrikama “Putokazi” i “Sagledavanja” u ovom broju *Novog Muallima*. Naime, Samedin Kadić u radu pod naslovom “Perenijalna filozofija i aporije vjerskog pluralizma: gledište Frithjofa Schuona i S. H. Nasra” izlaže metafizičke osnove “transcendentnog jedinstva religija” perenijalne filozofije kao jedinstvenu perspektivu unutar koje je jedino moguć ekumenizam, odnosno puno međureligijsko uvažavanje.

U tekstu pod naslovom “Tarik Ramadan i njegova interpretacija reforme islama” Bilal Hodžić razmatra koncept reforme islamskog mišljenja i prakse jednog od najznačajnijih savremenih muslimanskih intelektualaca koji se zalažu za dinamičko razumijevanje Šerijata u sferi pravnog i socijalno-etičkog, odnosno muslimanskog društveno integriranog aktivizma.

U prijevodu Almira Fatića objavljujemo studiju Abdul Kabira Hussaina “Kritika teorije kur’anske hermeneutike Muhammeda Arkouna”. Riječ je o kritičkom pogledu na hermeneutiku i teoriju Objave zasnovanu na historijsko-antropološkoj, lingvističko-semiotičkoj i teološko-egzegetskoj interpretaciji Objave islama jednog od najznačajnijih muslimanskih intelektualaca na kraju XX stoljeća.

U rubrici “Muallimov intervju” Harun Karčić razgovara o islamskoj tradiciji i savremenosti, o uzrocima muslimanskog ekstremizma, kao i o značajnim izazovima postmodernog svijeta sa Ziauddinom Sardarom, muslimanskim piscem koji se u svjetskim razmjerima na referentan način kritički bavi islamskim mišljenjem, filozofijom znanja i znanosti te kulturološkim temama u najširem spektru njihovih značenja. U istoj rubrici donosimo i razgovor Ivana Ejuba Kostića o identitetu, ljudskim pravima, feminizmu, slobodi, kapitalizmu i drugim pitanjima sa sestrom Teresom Forcades, koju smatraju ikonom evropske ljevice i najradikalnijom časnom sestrom Evrope.

U rubrici Islamske teme u ovom broju Enes Karić objavljuje kratki esej o tome kako se u klasičnim tumačenjima gleda na Idrisa, alejhisselam. Besim Rama u svom radu “Interpretacija sunneta u časopisu El-Hidaje” predstavlja razumijevanje sunneta u prvom redu kroz radove trojice bošnjačkih alima u dvadesetom stoljeću: Mehmeda Handžića, Muhameda Tufe i Kasima Dobrače. Zehra Čajlaković piše o “Propisima hadža koji se odnose na žene”.

U rubrici “Historija obrazovanja” nekoliko veoma značajnih, opsežnih i zanimljivih studija. Rad Suada Mahmutovića pod naslovom “Vakufname nekada i danas”, kroz predstavljanje forme vakfija / vakufnama, bavi se na dokumentiran, analitički i kritički način, etički, pravno i društveno relevantnim pitanjem iznevjeravanja volje vakifa i funkcije vakufa. U radu o “Hanikasima u Bosni i Hercegovini i njihovoj transformaciji u medrese” Azra Medara bavi se zanimljivim i za historiju muslimanskog obrazovanja u Bosni i Hercegovini značajnim kulturnim i društvenim fenomenom. O “Osman-kapetanovoj medresi i njenom značaju za Kadiluk Gračanica u periodu od 1800. do 1945. godine” piše Mersed Šabanović. Zanimljiv osvrt na jedan arhivski dokument vezan za rad *Darul-Muallimina* objavljuje Mina Kujović.

U rubrici “Pregled” i u ovom broju objavljujemo prikaze, osvrte i recenzije na neka značajna izdanja, knjige i publikacije.

Senada Tahirović